

Ni Chivinti yu Ts'oqnil Pablo ni Filemón

Ni Pablo mastak'ay yu Filemón

¹ Kit'in kPablo, va kch'ikanta por klaqpute'ey ixchivinti Jesucristo. Va ch'antaun kun yu kilaqaj Timoteo klats'oqniyau uxint'i Filemón. Ox kilat'atapatsayau, xlihyucha ayaj klapaxkayau. ² Vachu ikmastak'ayau ni Apia yu kint'alapanakk'an yu ikpaxkayau y vachu Arkipo yu kintat'ataylhaanan ni lach'apati por kilhakapu'atk'an y vachu ikmastak'ayau yu talhakapu'anan yu tataqxta'la la minchaqa'. ³ Katamapaynin y oxamaktaun katamakan ni kimPay Diosk'an kun Jesucristo kiJalhachimo'onuk'an.

Ixjapaxkanti ali ixlhakapu'ati ni Filemón

⁴ Ikxtaqni'alhiy lhimalaqpuchuncha ni Dios y klapastak'au ni uxiknan tejkan iksk'in ni Dios. ⁵ Kintajuniy ni ox ach'aniny y lhak'ap'up'in ni Jesús kiJalhachimo'onuk'an y lakp'axk'ay tachun ixlapanakni. ⁶ Va iksk'in Dios para kalakmamp'andin alati lapanakni milhakapu'ati y chuncha kaxajchal ni kamisp'at'i tachun yu ox yu Dios kintaxtaqniyan kijnank'an yu ch'antaun kun Cristo Jesús juntau. ⁷ Ayaj ijk'achanau y ox k'atsanau por mijapaxkanti. Uxint'i, laqaj, ox lakmalaka'ulay ni ixlapanakni Dios la ixjalhanutk'an.

Ni Pablo tapayniy por yu Onésimo

8 Xlhiyucha mas kun Cristo klhit'ajun lhachimo'on para kaklhijunin yu maqsk'iniy, 9 pero k'achaniyan, xlhiyucha vamun iktapayniniyan. Kit'in kPablo ayaj xapaycha y chavaycha va ktach'in kunita por Cristo Jesús. 10 Va iktapayniniyan por Onésimo. Yucha kilaqmil ta'an iktanun laka pach'in y tacha kints'al val por ixlhakapu'ati.

11 P'unaj jantu ox ixjunita para ka'aqtayjun pero chavaycha ox lay aqtayjuyan y vachu lay ki'aqtayjuy ni kit'in. 12 Chavay yucha ikmalaqachanichoqoyan. La ox k'ala'a'it'i vachu va tacha kila'a'it'i ni kit'in. 13 Va xaknajun ixtaulal kun kit'in ex chuncha ixkintapatsanil por uxint'i. Va aniy iktanun laka pach'in por klaqpute'el yu ox chivinti yu lhichiviniy Jesucristo. 14 Pero jantu klhijunputun kataulal aniy incha jantuka' mintak'atsan kaval. Jantu iknajun ni ki'aqt'ay'ut'i laqatap'asta, va iknajun ki'aqt'ay'ut'i laqa'achati.

15 Ka va lay ixmakauntan taun panch'ix para chavaycha lay kala'a'ich'o'o y kat'ataulan mas va tavanancha. 16 Jantucha kuna' tacha oqxtamati, va tacha milaqaj yu paxkayan. Chuncha apalay ox xajantu yu vali'iy oqxtamati. Yucha ox ikpaxkay ni kit'in pero apalay kap'axk'at'i ni uxint'i, jantucha tacha vali'iy lapanaki, va tacha milaqaj kalaqts'i. Mila'at'uyk'an va ixlapanaknicha ni Jalhachimo'onu' Jesucristo unt'at'ik.

17 Incha kilaqts'in tacha milaqaj y ch'antaun juntau ex kala'a'it'i ni yucha vachu va chun tacha k'ila'a'it'i ni kit'in. 18 Chavay incha yucha va makanitan taun laqtaqal o incha va

lhaaniyan tu'uchun ex kalaqts'i va tacha ni kit'in kaklhaanin. ¹⁹ Kit'in Pablo ikts'oqniyan la kimaka'. Va kunan ni kakmapalniyan, pero jantu ikmaqsk'iniy kajkunin. Uxint'i k'ats'aycha ni k'ilhipinin metsukunti. ²⁰ Ex chuncha, laqaj, k'amak'at'i yu klhitapayniniyan por ch'antaun juntau kun yu Jalhachimo'onu'. Chuncha k'imalak'a'ulanin kelhanuti por ch'antaun juntau kun yu Jalhachimo'onu' Cristo.

²¹ Ikts'oqniyan por ijk'atsaycha ni ki'almasat'e'e y apalay k'amak'aye'e tacha klhitapayniniyan kamak'at'i. ²² Vachu k'ala'oxit'i ta'an lay kaktaulal la minchaqa'. Klhilay ni por sk'inat'ik ni Dios lay klalaq'anchogotacha'au ta'an vilanant'ik.

Ni Pablo mastak'achogoy ni Filemón

²³ Vachu mastak'ayan ni Epafra yu kint'atanun laka pach'in por Cristo Jesús. ²⁴ Vachu tamakstak'ayan ni Marcos ali Aristarco ali Demas ali Lucas yu kintat'atapatsay. ²⁵ Katamapaynin ni Jalhachimo'onu Jesucristo la metsukuntik'an. Chuncha kavalcha.

**Ixchivinti Dios: ni sast'i chivinti yu Dios
jat'atamakaul ixlapanakni laka lhimasipijni
New Testament in Tepehua, Tlachichilco
(MX:tpt:Tepehua, Tlachichilco)**

copyright © 2004 Wycliffe Bible Translators, Inc.

Language: Tepehua, Tlachichilco

Translation by: Wycliffe Bible Translators, Inc.

Tepehua, Tlachichilco [tpt], Mexico

Copyright Information

© 2004, Bible League International

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tepehua, Tlachichilco

© 2004, Bible League International

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

9bc3139d-0023-5d1b-901b-a143c1b0431c